

# Utusan

Penyebarnya Fikiran Rakyat

MALAYSIA

www.utusan.com.my

Robinho sensasi baru EPL



Trulli bimbang perlumbaan malam F1 Singapura

- Muka 32



## Sokong keamanan bersama Walk For Peace

Oleh MOHD. KHUZAIRI ISMAIL  
(WARTAWAN UTUSAN)

HAKIKATNYA, dalam menjalani kehidupan di sebuah bumi merdeka seperti Malaysia ketika ini, kita sebenarnya masih terlalu jauh daripada mengecapi nikmat keamanan dalam erti kata yang sebenar.

Justeru, adalah sesuatu yang sangat penting untuk semangat dan rasa cintakan keamanan itu senantiasa disemai dan subur dalam jiwa setiap rakyat Malaysia dan menjadi pegangan ke arah sebuah negara yang bebas daripada anasir kejahatan.

Atas keperluan untuk memupuk kesedaran terhadap pentingnya keamanan itu juga, Pertubuhan Veteran Dunia akan menganjurkan program *Walk For Peace* yang akan disambut secara serentak di seluruh dunia pada 21 September ini, tepat pada pukul 12.00 tengahari.

Dengan keahlian pertubuhan itu sebanyak 170 buah persatuan dari 90 buah negara, sambutan *Walk For Peace* bakal menjadi acara antarabangsa menerusi penyertaan kira-kira 30 juta orang warga veteran dari seluruh dunia.

Apa yang lebih membanggakan, sambutan *Walk For Peace* yang julung kali diadakan itu adalah hasil inisiatif rakyat Malaysia sendiri, iaitu Lefenan Kolonel (B) Datuk Abdul Hamid Ibrahim yang merupakan Presiden Pertubuhan Veteran Dunia. Sambutan *Walk For Peace* akan diadakan di Dewan Merdeka, Pusat Dagangan Dunia Putra (PWTC) dan dianjurkan oleh Pertubuhan Angkatan Tentera Veteran Malaysia (MVATM).



YASOTHA KRISHNA



KHAIRUDDIN ABU BAKAR

Sambutannya juga bakal dimeriahkan dengan penyertaan seramai kira-kira 3,500 orang daripada pelbagai pertubuhan dan persatuan termasuk kerajaan, badan bukan kerajaan (NGO), sektor korporat, artis, tokoh-tokoh terkemuka, sekolah, institusi pengajian tinggi (IPT) dan banyak lagi.

Antara yang sudah mengesahkan penyertaan termasuk Kelab Pegawai Rejimen Askar Melayu Diraja, Kelab Bekas Anggota Kor J/LJ Diraja, Kelab Veteran Komando Malaysia, Kelab Veteran Kor Risik Diraja Malaysia, Persatuan Bekas Guru Angkatan Tentera Malaysia dan banyak lagi.

Menjelaskan lebih lanjut, Pengerusi Jawatankuasa Penganjuran Veteran *Walk For Peace*, Mejar Jeneral (B) Datuk Khai-

ruddin Abu Bakar berkata, program itu merupakan simbolik kepada penyatuan seluruh rakyat Malaysia tanpa mengira agama, kaum, latar belakang atau usia untuk menyatakan rasa cinta terhadap keamanan.

Program yang dijangka dihadiri oleh Timbalan Perdana Menteri yang juga Menteri Pertahanan, Datuk Seri Najib Tun Razak itu memabitkan perhimpunan peserta yang mengambil bahagian dengan mengambil sambutan beberapa acara.

Antaranya ucapan Naungan Abdul Hamid dan mesej keamanan daripada Setiausaha Agung Pertubuhan Bangsa-Bangsa Bersatu (PBB), Ban Ki-moon serta nyanyian lagu keamanan yang dicipta khusus untuk sambutan *Walk For Peace*.

"Harapan kami, mesej keamanan itu tidak hanya dirasai oleh peserta yang mengambil bahagian di dalam dewan pada hari itu sahaja, sebaliknya seluruh rakyat turut bertafakur selama satu minit tepat pada pukul 12.00 tengahari pada hari berkenaan sebagai salah satu usaha dalam diri sendiri untuk mengharapkan keamanan akan kekal dan berterusan," katanya.

Sementara itu, Timbalan Presiden Friends 2 Mankind, Yasotha Krishna berkata, sebagai sebuah pertubuhan yang turut memperjuangkan keamanan dalam setiap ruang ke-

hidupan, sambutan *Walk For Peace* adalah satu usaha yang tidak harus dilepaskan begitu sahaja oleh seluruh rakyat Malaysia.

Berpegang kepada prinsip setiap daripada kita adalah kawan kepada yang lain, program itu juga katanya, merupakan sebuah usaha massa dalam usaha menghidupkan nilai-nilai keamanan baik di negara ini atau di seluruh dunia sepanjang masa.

*Walk For Peace* juga diharapkan mampu menetus satu kesedaran yang cukup tinggi di kalangan seluruh rakyat Malaysia terutamanya, untuk menghargai nilai-nilai keamanan yang sedia subur ketika ini dan berusaha untuk mempertahankannya dan menjadikannya lebih baik.

"Keamanan adalah sebuah ruang kehidupan yang memerlukan kerjasama dan penglibatan daripada setiap manusia dan hanya akan tercapai apabila mereka menganggap setiap manusia yang lainnya adalah kawan," katanya.

Yasotha menambah, adalah sesuatu yang sangat membanggakan apabila rakyat Malaysia menjadi pencetus kepada program keamanan seperti *Walk For Peace* itu dan peluang tersebut seharusnya digunakan untuk menunjukkan kepada dunia bahawa rakyat di negara ini masih boleh meneruskan kehidupan dalam kepelbagaian agama, kaum dan amalan hidup penduduknya.

Orang ramai yang berminat untuk menyertai program *Walk For Peace* atau ingin mendapatkan maklumat lanjut mengenai ini boleh menghubungi MVATM di talian 03-4297 1743 atau Friends 2 Mankind (03-6157 7746) atau melayari laman web [www.mvatm.org](http://www.mvatm.org)

Utusan  
MALAYSIA

10 | Rencana